

## SKIPULAGSSKRÁ fyrir Jarðasjóð Vestur - Húnavatnssýslu.

### 1. gr.

Sjóðurinn heitir Jarðasjóður Vestur-Húnavatnssýslu. Hann er eign sýslunnar. Heimili og varnarþing er í Vestur-Húnavatnssýslu. Um ráðstöfun á eignum og tekjum sjóðsins fer eftir því, sem fyrir er mælt í skipulagsskrá þessari.

### 2. gr.

Sjóðurinn er stofnaður 10. janúar 1940 af Skúla Guðmundssyni, kaupfélagsstjóra á Hvammstanga, til minningar um foreldra hans:

Guðrúnu Einarsdóttur og Guðmund Sigurðsson.

Guðrún (Magðalena Guðrún) er fædd að Tannstaðabakka í Hrótafirði 13. júlí 1868, dóttir hjónanna Guðrúnar Jónsdóttur og Einars, bónda og gullsmiðs, Skúlasonar. Guðmundur er fæddur að Urðarbaki í Vesturhópi 26. mars 1875, sonur hjónanna Ólafar Guðmundsdóttur og Sigurðar Jónassonar, er þar bjuggu þá, en fluttust 8 árum síðar að Svertingsstöðum í Miðfirði. Þau Guðrún og Guðmundur giftust að Tannstaðabakka 20. júní 1898 og hófu búskap á Svertingsstöðum, en fluttust vorið 1915 til Hvammstanga, þar sem Guðmundur var kaupfélagsstjóri til ársloka 1922. Guðmundur andaðist á Landakotsspítala í Reykjavík 14. janúar 1923, en Guðrún að Staðarbakka í Miðfirði 11. október 1929.

### 3. gr.

Stofnfé sjóðsins er jörðin Syðri-Velli í Kirkjuhvammshreppi, með öllum húsum og mannvirkjum.

### 4. gr.

Tekjur sjóðsins eru:

Eftirgjald eftir jörðina Syðri-Velli.

Eftirgjald eftir aðrar jarðir sem sjóðurinn kann að eignast.

Vextir, verðbætur og annar hagnaður af sjóði.

Önnur framlög.

### 5. gr.

Eignir sjóðsins, aðrar en fasteignir, skulu ávaxtaðar hjá Sparisjóði Vestur-Húnavatnssýslu eða annarri tryggri peningastofnun að mati sjóðstjórnar.

### 6. gr.

Tilgangur sjóðsins er:

- a. Kaupa jarðir í Vestur-Húnavatnssýslu, sem boðnar eru til sölu, á sem hagstæðustu verði, að mati sjóðstjórnar, enda liggi jarðirnar ekki undir skemmdum af völdum náttúru, séu þannig í sveit settar að sjóðstjórn telji eigi hættu á að þær leggist í eyði og engar aðrar

sérstakar ástæður mæli gegn kaupunum. Jarðir þær sem sjóðurinn kann að kaupa skulu byggðar í samræmi við ákvæði Ábúðarlaga.

- b. Verja eða veita peningum til sérstakra verkefna, sem lúta að framförum búnaðarmála eða sem styrkir landbúnað í Vestur-Húnavatnssýslu.

Sjóðstjórn skal gæta þess að ávallt sé til í sjóðnum, í formi peninga, ríkistryggðra verðbréfa, fasteigna eða á annan trygган hátt jafnvirði upphaflegs uppfærðs stofnfjár sjóðsins.

Sjóðstjórn skal heimilt að veðsetja eða selja eignir sjóðsins, þ.m.t. jörðina Syðri-Velli, þegar og ef hún telur nauðsynlegt til að ná sem best fram tilgangi og markmiðum sjóðsins, allt að fenginni umsögn Ríkisendurskoðunar og með samþykki dómsmálaráðherra.

#### 7. gr.

Stjórn sjóðsins skipa þrír menn, til þriggja ára í senn. Einn kosinn á aðalfundi Kaupfélags Vestur-Húnavetninga, annar kosinn af Búnaðarsambandi Vestur-Húnavatnssýslu og sá þriðji tilnefndur af héraðsnefnd Vestur-Húnavatnssýslu, á meðan hún starfar, en síðan af hinu nýja sameinaða sveitarfélagi í sýslunni, frá og með 1.júní 1998. Hætti annað tveggja fyrst greindu félaga starfsemi, skal hið nýja sveitarfélag kjósa mann í stjórnina. Komi síðar samvinnufélag eða samband búnaðarfélaga í sveitinni, í stað þess sem kynni að hætta starfsemi, skulu þau hljóta fyrrgreindan rétt til að kjósa fulltrúa í stjórn. Stjórn sjóðsins hefir umsjón með eignum hans, semur um leigu á jarðeignum þegar þær losna úr ábúð og gefur út byggingarbréf. Hún varðveitir skjöl sjóðsins, innlánsbækur og önnur verðmæti, og annast reikningsbókhald hans.

#### 8. gr.

Reikningar sjóðsins skulu endurskoðaðir árlega af sömu aðilum og endurskoða reikninga sveitarfélagsins. Reikningsár skal vera almanaksárið. Reikningar skulu birtir með reikningum hins sameinaða sveitarfélags.

#### 9. gr.

Ekki verða gerðar breytingar á skipulagsskrá nema með samþykki stjórnar og að fenginni umsögn Ríkisendurskoðunar og með samþykki dómsmálaráðherra. Verði sjóðurinn lagður niður skal eignum hans varið til framfaramála í landbúnaði í sýslunni, samkvæmt tillögu stjórnar, en að fenginni umsögn Ríkisendurskoðunar og með samþykki dómsmálaráðherra.

Að öðru leyti gilda um sjóðinn ákvæði laga um sjóði og stofnanir sem starfa samkvæmt staðfestri skipulagsskrá nr. 19/1988.

Skipulagsskrá þessi kemur í stað skipulagsskrár fyrir Jarðasjóð Vestur-Húnavatnssýslu, sem staðfest var 8. apríl 1940 og birt í B-deild Stjórnartíðinda nr. 73, 8. apríl 1940.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

*Dóms- og kirkjumálaráðuneytinu, 8. október 1998.*

F. h. r.

**Þorsteinn Geirsson.**

*Fanney Óskarsdóttir.*